

MKF EKI Sarajevo
Generalni direktor
Datum: 29.10.2018. godine
Broj: 64057-03-1/10-2018

Na temelju člana 29. Statuta Mikrokreditne fondacije EKI Sarajevo (u daljem tekstu: MKF EKI), a u skladu sa članom 6. i 9. Zakona o medijima Kantona Sarajevo (Službene novine Kantona Sarajevo" broj 13/98) i članom 15. Zakona o Mikrokreditnim organizacijama FBiH (Službene novine FBiH broj 59/06) Generalni direktor donio je dana 29.10.2018.godine

PRAVILNIK O DODATNOJ USLUZI EKI POSLOVNI KLUB, UREĐIVANJU I IZDAVANJU ČASOPISA EKI OGLASI

Član 1.

EKI Poslovni klub (u daljem tekstu EPK) je besplatna usluga (tehnička pomoć) koju EKI nudi svojim klijentima sa ciljem da se poboljša tržišna pozicija i poslovne aktivnosti EKI klijenata, kao i da se unaprijede kreditne aktivnosti EKI-ja.

EPK predstavlja dodatnu besplatnu uslugu koju MKF EKI osigurava svojim aktivnim klijentima, a u skladu sa članom 15. Zakona o Mikrokreditnim organizacijama FBiH (Službene novine FBiH broj 59/06), i kojom se vrši promocija djelatnosti MKF EKI, edukacija klijenata MKF EKI iz raznih oblasti poslovanja, njihovog uvezivanja kako bi mogli besplatno međusobno da trguju putem oglasnika, da komuniciraju i razmjenjuju svoja iskustva, te da poslovno ojačaju.

Član 2.

Kao sastavi dio dodatne usluge EPK je časopis EKI OGLASI (u daljem tekstu: časopis).

EKI Oglasi je štampani i elektronski nekomercijalni medij, koji se distribuira besplatno u skladu sa članom 15. Zakona o Mikrokreditnim organizacijama FBiH (Službene novine FBiH broj 59/06) kojim je propisano da Mikrokreditna organizacija može obavljati u manjem obimu ili privremeno i druge djelatnosti koje služe i koje se uobičajeno obavljaju uz djelatnost mikrokreditiranja, uključujući: kreditne konsultacije, poslovno savjetovanje i tehničku pomoć u cilju unaprjeđenja kreditnih aktivnosti mikrokreditne organizacije i poslovnih aktivnosti korisnika mikrokredita.

Član 3.

Časopis se dostavlja članovima EKI Poslovnog kluba na adrese stanovanja, adrese biznisa ili e-mail adrese koje su dostavili redakciji časopisa prilikom učlanjenja u EPK. Takođe, značajan broj EKI Oglasa se distribuira širom BiH, u EKI kancelarijama ili na terenu od strane EKI službenika. EKI Oglasi se mogu preuzeti i u elektronskoj verziji sa sajta www.eki.ba (promocija ovog načina preuzimanja EKI Oglasa se odvija putem Facebook-a, Twitter-a, Instagram-a, Viber-a i drugih društvenih mreža, servisa i medija).

Član 4.

Da bi EKI klijenti imali pravo na distribuciju časopisa i korištenje dodatne besplatne uluge iz člana 1. ovog Pravilnika potrebno je da u vidu pisane saglasnosti (Sporazum o razumijevanju) pristupe u članstvo EPK.

Članstvo klijentima obezbjeđuje pravo na oglašavanje prodaje svojih proizvoda u časopisu EKI Oglasi za vrijeme dok imaju poslovni odnos sa MKF EKI, tj. dok imaju aktivni kredit u MKF EKI uključujući i dodatni period, maksimalno 2 mjeseca po otplati kredita.

Član 5.

Naziv časopisa je **EKI OGLASI**

Časopis je uveden u registar ISSN Centra Bosne i Hercegovine 30.03.2018. godine pod brojem **ISSN 2566 – 4263**.

Časopis izlazi jedanput mjesečno u tiražu od cca. 20.000 primjeraka.

Časopis je besplatan i distribuira se članovima EPK koji su EKI klijenti i oglašivači oglasnih poruka.

Član 6.

Časopis uređuje redakcijski kolegijum, čije sjedište je u Brčkom, Bulevar mira 10/1 Brčko distrikt, tel: ++387 49 235 661, faks ++387 49 235 663, e-mail: poslovniklub@eki.ba.
Časopis ima svoju web-stranicu (www.ekiposlovniklub.ba) koja sadrži sve informacije o časopisu i Uredništvu časopisa.

Član 7.

Izdavačka politika časopisa provodi se prema Zakonu o medijima kantona Sarajevo (Službene novine Kantona Sarajevo" broj 13/98), a temelji se na načelima struke i morala.

Uredništvo časopisa čini Redakcijski kolegijum časopisa, a njega čine uposlenici MKF EKI iz Službe marketinga koji u okviru svojih radnih zadataka vrše i organizuju način prikupljanja i obrade građe i štampanje časopisa i to:

1. glavni urednik,
2. zamjenik glavnog urednika
3. saradnici u uredništvu

Član 8.

Sredstva za uređivanje, štampanje i distribuciju časopisa osigurava MKF EKI.
Financijsko poslovanje časopisa vodi računovodstvo MKF EKI Sarajevo u okviru marketing budžeta, za koje je nalogodavac glavni urednik, po ovlaštenju Generalnog direktora MKF EKI.

Član 9.

Oglase pristigle u redakciju kontroliše i revidira član Uredništva časopisa, uz unaprijed definisana pravila (nisu dozvoljeni oglasi za prodaju ili kupovinu oružja, alkohola, duvana i duvanskih proizvoda, narkotici, bilo koji vid kocke i igara na sreću, lični oglasi, alternativna medicina i oglasi koji na bilo koji način mogu nekog uvrijediti na rasnoj, vjerskoj ili bilo kojoj drugoj pripadnosti). Oglas se odbija za štampanje ukoliko nije u skladu sa ovim pravilima. Oglasi prikladni za daljnje razmatranje u časopisu šalju se na pripremu za štampu.

Promotivne materijale i edukativne tekstove, koji se štampaju u oglasniku, priprema Uredništvo časopisa ili spoljni saradnici ili vanjski saradnici-autori, a odobrava ih isključivo Uredništvo časopisa. Mišljenje o tekstovima sa primjedbama dostavlja se autorima kako bi uskladili tekst s primjedbama. Ispravljenu verziju provjerava zamjenik urednika ili glavni urednik, te predlažu rukopis za objavljivanje.

Član 10.

Pravilnik stupa na snagu danom donošenja.
Pravilnik će se oglasiti na web-stranicama MKF EKI najkasnije 15 dana nakon njegovog donošenja.

Za MKF EKI Sarajevo
Sadina Bina V.D Generalnog direktora

